



Rua do Mercado Municipal, Dili -Timor-Leste /Mobile Phone 77999304/77236782/[forumong.tl@gmail.com](mailto:forumong.tl@gmail.com) /[freitas\\_nono@yahoo.com](mailto:freitas_nono@yahoo.com)

## Core Group Transparency no Forum ONG Timor-Leste

### Komunikadu Imprensa

Maske estadu prezisa osan, maibé la signifika enfrakeza Lei Fundu Petrolíferu

Lei Fundu Petrolíferu Artigu 26(g) hili sosiedade sivíl nudár parte ida hosi Konsellu Konsultativu Fundu Petrolíferu atu bele fó asesoria bainhira Governu introduz lejislasaun sira kona-ba dotasaun hosi Fundu Petrolíferu. Nune'e, ho komunikadu ida ne'e, nudár parte ida hosi preokupasaun sosiedade sivíl nian ba Lejislatura dalima nian ne'ebé kria hela ezbosu revizaun ba Lei Orsamentu no Jestaun Finanseiru no mós Lei Fundu Petrolíferu atu bele fasilita levantamentu osan Fundu atu finansia estadu.

Maske, ami konkorda katak Governu prezisa hela osan tanba dezde iha tinan kotuk laiha Orsamentu Rektifikativu no mós orsamentu jerál estadu 2018, maibé dalan ida atu foti osan ne'e la prezisa enfrakeza prinsipiu di'ak sira hosi Lei Fundu Petrolíferu rasik, basa, Fundu ne'e rasik tenke jere ho política ne'ebé di'ak ba benefísiu jersaun ohin no futuru nian, no nudár instrumentu ida ne'ebé bele kontribui ba política fiskál ida ne'ebé di'ak, inklui nia levantamentu mós tenke tetu tiha interese tempu naruk povu Timor-Leste nian.

Ami tetu ona ho kle'an katak planu revizaun ba lei rua importante ida ne'e nudár forma enfrakesimentu jestaun di'ak reseita petrolíferu ne'ebé durante ne'e sai tiha orguilozu povu Timor-Leste nian. Revizaun ida ne'e sei kria presedente ida ne'ebé ladi'ak ne'ebé hafasil liu tan gasta riku soin povu nian laho responsabilidade no sei afeta ba jersaun ohin no mós aban bainrua nian. Tanba ne'e, ami sujere atu:

- Timor-Leste prezisa mantén nia regra di'ak sira ne'ebé promove boa governasaun no transparénsia orsamentál no mós reseita petrolíferu nian. Nune'e, atu antisipa situaun polítika ohin lora nian ne'ebé antes ne'e la antisipa iha Lei Orsamentu no Jestaun Finanseiru no mós Lei Fundu Petrolíferu rasik, Parlamentu bele halo de'it revizaun simples ida ne'ebé mensiona montante spesífiku ba iha tinan 2018 ne'e de'it, ne'ebé nia montante labele liu projesaun RSE ba 2018 ho token \$475.1 ne'ebé kalkula ona iha Orsamentu Jerál Estadu 2017. Levantamentu ida ne'e mós tenke konsidera levantamentu sira ne'ebé halo tiha ona iha fulan Maiu hosi Governu da hitu nian. Karik Parlamentu hakarak atu halo mudansa boot iha Lei Orsamentu no Jestaun Finanseiru inklui Lei Fundu Petrolíferu Revizaun, Parlamentu bele konsidera ida ne'e iha nia mandatu tinan lima oin mai nia laran.
- Prosesu Orsamentu tenke nafatin tuir mekanizmu duodecimo nian to iha Orsamentu Jerál Estadu 2018 aprovalu no Promulgadu. Nune'e mós, levantamentu Fundu Petrolíferu nian mós tenke tuir prinsipiu duodecimo nian katak token \$475.1 X 1:12 = token \$39.6 ne'ebé sura keda hosi Janeiru 2018.
- Governu da Walu ida ne'e bele prosesa lalais nia Orsamentu Jerál Estadu 2018 ho normal tanba iha apoiu forsa maioria Parlamentár. Situaun ne'e la akontese ba Governu da hitu ne'ebé la hetan apoiu maioria Parlamentár. No bainhira levantamentu Fundu nian iha mandatu Governu da hitu nian ida ne'e akontese, PN dissolidu hela. Maske nune'e, ami

preokupa ho menus konsulta hosi Governu iha tempu ne'ebá ho entidade sira, especialmente sociedade sivil.

- Ami enkoraja atu Parlamentu Nasional bele halo audiéncia públiku ida ne'ebé kle'an liu ho entidade sira hotu hanesan sociedade sivil, academia, partidu polítiku sira, Konsellu Konsultivu Fundu Petrolíferu no mós públiku sira seluk kona-ba planu revizaun lei fundamental rua ne'e.
- Situasun ida ne'e fó lembra fila fali ba ita katak Timor-Leste presiza duni diversifikaun ekonomia, nudár dalan ida atu bele hametin liu tan ekonomia rai laran.
- Atu taka, ami hakarak tau énfaze katak ami fiar, membru Parlamentu sira sei tau tiha interese povu nian as liu fali sira nia interese partidu no poder ukun nian, atu lori moris dí'ak ba povu Timor-Leste.

Dili 11 Jullu 2018

Deklarasaun Konjunta

Diretór Executivu Fongtil,  
KKFP

Rep. Koordinadór CGT, Representante sociedade sivil ba